

1 Tilmolseiq

Gevq-a nail gaq

Haoqgavq niil keiv iqmoeq ilmoeq bhai Gaqkhoel Paolluv aivq-i mail gevq-a nail ngaol dai, gevq-ai thaq nail ngaol. Al ovqtavq, milnee uqnee khe Khali yaq juq jemao iqsanl, Paolluv-i mail gevq-a nail ngaol dai, noeq nail ngaol.

Gevq-a nail aqyanq khi aqduq

Gevq-a nail aqyanq neq, A.D. 62-64 kovq bhai ngaol. Gevq-a nail aqduq neq, Maqgeiqdaolnil milkhaoq bhai ngaol. Paolluv Lolmav meenq nail thaonq bhai nvq pov teevq pov maq bhi nieivq bhoel dan-u nee mail, gevq-a nail ngaol.

Khaq sil gaq bhai gevq bhiq-a nail

Haoqgavq niil keiv neq, Tilmolseiq bhai gevq bhiq-a nail ngaol. Tilmolseiq neq, Luldaqlal meenq yaq ngaol. Tilmolseiq dai ge nail dao-qceevq neq, Miqyail bhai tsiqeeq tsiqheel nail dai, ge movq nail ngaol. Aivq nail aqma neq, Khali yaq pevq nail Yuldav tsaol-aq Ulnil dai mil khi, aivq nail aqbhu neq, Heiqlaqsal tsaol-aq ngaol. Aivq yaqnoil-ail jiav-u nee mail Jalliq aqlil heeq nia nail ngaol. Yuldav tsaol-aq nee mail ganl nl tavq nia dai Paolluv-i mail bavkov uqjaq oev bhiq-a nail ngaol. Tilmolseiq neq, gaqkhoel tsel nvq gaq nail lavqkhoel bhai maq aol-ail. Aivq neq, Khali yaq munl juq bhai heldaiq phail khi Paolluv bhai ganl nl tsao bhiq nail teevq gaq ngaol.

Khul bhai noeqthunq khi gevq-a nail

Haoqgavq niil keiv neq, Paolluv-i mail Tilmolseiq bhai, Eilpheilsu meenq khe Khali yaq munl bhai heldaiq phail nail juq khalhai ya tsel dov khi, ya heldaiq phail nail dai, gevq bhiq-a nail ngaol. Khul khi mail dai ngal-aq, yanq al yanq bhai neema thaqtsaol nail phaqaq maq dul lai nail ganl cavq bheeq nail tsaol-aq dov lal-a nail ngaol. Alheel ngel-i mail, Khali yaq juq aqdoevq khalhai ya doevq khi Miqyail nail ganl nl yaq juq khalhai ya nl nail dai, gevq bhiq-a nail ngaol.

Iqmoeq ilmoeq khe daoq

¹ Ngal neq, Yeiqsul Khali nail gaqkhoel Paolluv ngaol. Ngadao nail Hevqkovq nail gaq pevq nail Miqyail khi ngadao nail noeqthunq duq pevq nail Yeiqsul Khali daoq bivq lavq-a nail khe-ai, gaqkhoel jiovq thailthaiq nail ngaol.

² Neema thaqtsaol nail phao ngaq nail yaqyov maldil pevq nail Tilmolseiq bhai haoqgavq niil gevq bhoel-ai leevq-a nail ngaol. Aqbhu Miqyail khi ngadao nail Heeqphaq Yeiqsul Khali nail geeqlaoq eeljaol, gaoqhaq gaiq-a nia nail phaqaq khi neesal-ovq nail phaqaq, naoq nail kovtavq bhai bhi jiav dei-eiq.

Maq dul lai nail neema thaqtsaol nail phaqaq bhai thaqaq gaoq cavq dai, daoq bivq yaoq

³ Ngal Maqgeiqdaolnil milkhaoq bhai lai nail dai khi-u phao, "Eilpheilsu meenq bhai jaol-aileevq yaoq" dai, naoq bhai hal-a nail ngaol. Maq tsaq nail phaqaq bhai, tsaol-aq teevq pav ganav juq bhai daoq bhi bivq nail dai khi, ngal naoq

bhai bhi jaol-ail ceevq-a nail ngaol. ⁴ Al ovqtavq, gangje juq bhai maqkhaiq, teevq thal-iq ge gil lai nail maq bhao nail aqceevq ge nail juq bhai maqkhaiq, thaq thageeq dei-eiq dai, aqyu juq bhai daoq bhi bivq nail dai khi iqsanl, ngal naoq bhai bhi jaol-ail ceevq-a nail ngaol. Ganl al juq neq, Miqyail-i mail bivq lavq-a nail neema thaqtsaol nail pha q bhai maq bhi dov lal-ail. Jil pheeljaq nail pha q taivq-ail bhi dov lal nail ngaol. ⁵ Naol aqyu juq bhai daoq alhai bivq-a nail bhaqda nee, aqyu juq goil nail gaiq-a nail pha q aol lal dai, ngal noeqthunq nail ngaol. Goil nail gaiq-a nail niil pha q neq, neema aqhaol haol dai, oeqbal tha q duq maq jiav nail heeq nia nail neema khi maldil neema thaqtsaol nail neema lavqkhoel nee dov lal nail ngaol. ⁶ Tsaol-aq teevq pav ganav juq neq, al hail pha q bhai khaonq-ail ceevq khi, khul nail ganl maq tsoiq nail juq bhai taivq-ail ge thailthaiq nail ngaol. ⁷ Aoldaoq kovqdaoq cavq nail cov nail tsaol-aq jiovq movq khi ngaol-aq, aqyu juq khalhai ge nail bhai maqkhaiq, neema eeq eeq-ail ge nail juq bhai maqkhaiq, aqyu juq maq heeq nia-ail.

⁸ Aoldaoq kovqdaoq neq, aqtsaq tsaq dai, yuq ha neq, aqmeeq ngaol dai, ngadao heeq kivq nail ngaol. ⁹ Tsaq nail daol nail tsaol-aq nail haqbhoil aoldaoq kovqdaoq bhi jiav-a nail maq ngel-ail. Maq meeq maq jaq nail pha q nl nail tsaol-aq, daoq maq naldaiq nail tsaol-aq, Miqyail bhai maq ev nail tsaol-aq, oeqbal nl nail tsaol-aq, maq meeq maq haol nail tsaol-aq, Miqyail nail aol bhai maq ev nail tsaol-aq, aqbhu aqma bhai heivq nail tsaol-aq, yu bhai lav heivq nail

tσαολ-αϑ, ¹⁰ κηαϑμιϑ σεϱ ναιλ τσαολ-αϑ, ϑαϑϑοϱ-αϑ αϑτσαοϑ γαιϑλαϑ βηαι μαϑ νλ κηαοϑ ναιλ φηαϑ νλ ναιλ τσαολ-αϑ, τσαοι-αϑ βηαι γαοϑ ναιλ τσαοι-αϑ, γοιϑβηαοϑ βηαοϑ ναιλ τσαοι-αϑ, γοιϑβηαοϑ βηαοϑ ναιλ λαϑκηοελ νεε σαλκηιλ κηανϑ ναιλ τσαοι-αϑ, μαλδιλ τσαϑ ναιλ γανλ ααϑ ναιλ αοϱ ναιλ φηαϑ βηαι λαϑ τσοιϑ ναιλ τσαοι-αϑ, μαϑ μεεϑ ναιλ ϑαοϑ φηαϑ ϑαοϑ-αο νεε νλ ναιλ τσαοι-αϑ νιιλ ϑυϑ ναιλ ηαϑβηοιι αοιδαοϑ κοϑϑαοϑ βηι ϑιαϱ-α ναιλ νγαοι δαι, νγαδαο ηεεϑ κιϑϑ ναιλ νγαοι. ¹¹ Μαλδιλ τσαϑ ναιλ γανλ αλ, γεεϑλαοϑ εεϑ ναιλ Μιϑυαιλ-ι μαιλ αϱ λαϑϑ-α ναιλ σειϑλειϑ κηαοϑσαοι εεϑ ναιλ λαϑκηιϑ τσαοι ναιλ γεεϑλαοϑ δαοϑ λαϑκηοελ νεε, δοϱ λεε ναιλ νγαοι.

Paolluv gaoqhaq gaiq-a lavq-a nail Miqyail bhai geeqlaoq eeq kovq nail ganl

¹² Νγαλ νγαδαο ναιλ Ηεεϑφηαϑ Υειϑσυλ Κηαλι βηαι τσιϑεεϑ ναοι. Κηυλ κηι μαοι δαι νγαλ νεϑ, αιϑϑ νγαϑ βηαι γαϑ βιϑϑ λαϑϑ-α ναιλ νγαοι. “Ναοι σαλϑιαλ ιϑϑ ναιλ νγελ-ι μαοι, νγαϑ ναιλ γανλ νλ νια-αιλ νιαλ” δαι, αιϑϑ νγαϑ βηαι σαοι-νϱϑ-αι τηαϑ κηι, τσελ δοϱ λαϑϑ-α ναιλ νγαοι. ¹³ ΢ελ λal-u φηαο, νγαλ Υειϑσυλ βηαι κηαλ γε μοϑϑ-αιλ γε-α ναιλ, αιϑϑ βηαι νεεμα τηαϑτσαοι ναιλ τσαοι-αϑ ϑυϑ βηαι κηοεϑ βηιϑ ϑιοϑϑ βηιϑ κηι ηαϑειϱ ναιλ γαϑ πεϑϑ-α ναιλ νγαοι. Τηαιληαι νγαοι-αοϑ, νγαλ νεεμα μαϑ τηαϑτσαοι λal-u φηαο, μαλδιλ τσαϑ ναιλ φηαϑ βηαι μαϑ ηεεϑ κιϑϑ-αιλ νλ-α ναιλ νγελ-ι μαοι, αιϑϑ νγαϑ βηαι γαοϑηαϑ γαιϑ-α λαϑϑ ναιλ νγαοι. ¹⁴ Υειϑσυλ Κηαλι ναιλ λαϑκηοελ βηαι αοι ναιλ νεεμα τηαϑτσαοι ναιλ φηαϑ κηι γοοι ναιλ γαιϑ-α ναιλ φηαϑ νεε τεεϑϑ γαϑ κηε-αι, νγαδαο ναιλ

Heeqphaq Miqyail nail geeqlaoq eeljaol iqsanl, maq ge gil tsaol dai, ngal ya-a nail ngaol.

¹⁵ Yeiqsul Khali neq, oeqbal yaq bhai hevqkovq lee nail dai khi, miltsaq kovtavq-ai lee-a nail ngaol dai, ge-ai thaq nail daoq niil daoq neq, saljial ivq khi, maldil hav bhoel heeq phaqaq-ail tsaq nail daoq ngaol. Ngal neq, oeqbal yaq nail lavqkhoel yu nee maqtsil oeqbal eeq nail gaq ngaol. ¹⁶ Thailhai phal-iq neq, Yeiqsul Khali khadai oltsaol nail ngel-ail dai, aivq phaodaiq bhiq movq nail ngel-i mail, ngal yu nee maqtsil oeqbal eeq khi ngaol-aq, aivq ngaq bhai gaoqhaq lavq-a nail ngaol. Alheel ngel-i mail, aivq bhai neema thaqtsaol nail bhaqda nee nqmaq maqluv halyeel doevq nail phaqaq ya nail tsaol-aq nail haqbhoil ngal neq, saol oil duq ngaol. ¹⁷ Miqyail neq, nqmaq maqluv halyeel uvthaiq nail Heeqphaq ngaol. Aivq neq, maq luq maq seil-ail nia-ail. Tsaol-aq aivq bhai maq moel nia-ail. Aivq teevq gaq taivq-ail Miqyail ngaol. Nqmaq maqluv halyeel aivq bhai tsiqeeq tsiqheel khi, seiqlaiq khaoqsail bhi jiav dei-eiq. Aqmiq.

¹⁸⁻¹⁹ Ngaq nail yaqyov Tilmolseiq-ol, aq-u phao, Miqyail nail haqbhoil gedan nail tsaol-aq juq neq, Aqhaqlal Miqyail bhai juq khi naoq nail ganl ge-ai thaq nail khe-ai, ngal naoq bhai daoq niailhai bivq nail ngaol. Neema thaqtsaol nail phaqaq bhai nieivq thaiq-ai thaqaq khi, oeqbal thaqaq duq maq jiav nail heeq nia nail neema aol nail lavqkhoel, aq-u phao ge-ai thaqaq nail al juq bhai juq juq-ail khi, genl aqmeeq-ail dev yaoq. Tsaol-aq teevq pav ganav juq neq, oeqbal thaqaq duq

maq jiaiv nail heeq nia nail neema bhai khaonq-ail ceevq-a nail ngel-i mail, laovq cov ail-a nail khe-ai, aqyu juq nail neema thaqtsaol nail neema cov ail-a nail ngaol. ²⁰ Huqmignail khi mail Aqleiqsaqdul iqsanl, cov ail-a nail tsaol-aq al juq nail lavqkhoel bhai aol nail ngaol. Miqyail bhai khal ge movq-ail maq ya ge-ail dai, aqyu nvq gaq bhai cavq bhi cov bhiq movq nail ngel-i mail, ngal aqyu nvq gaq bhai neivq Saqdaq nail aqlavq lavqkhoel bhai av bhiq-a nail ngaol.

2

Geeqlaoq hal nail ganl saol bhiq-a nail ganl

¹ Iqmoeq khe phaqaq, ngal naoq bhai gaq niailhai bivq nail ngaol. Miqyail bhai geeqlaoq hal nail, yu nail haqbhoil geeqlaoq hal nail khi, Miqyail bhai tsiq eeq nail juq, tsaol-aq iqsanl nail haqbhoil hal yaoq. ² Heeqphaq juq khi uvthaiq nail juq nail haqbhoil iqsanl alhai hal yaoq. Alhai hal haq neq, ngadao neesal-ovq khi, neema aqsal sal nail lavqkhoel, Miqyail bhai ev khi, aqmeeq aqhaol nail lavqkhoel nee ya doevq nail ngaol. ³ Alhai geeqlaoq hal nail neq, ngadao nail Hevqkovq nail gaq pevq nail Miqyail nail sivatavq bhai aqmeeq teevq phaqaq pevq khi, aivq neekhaol sil nail phaqaq iqsanl pevq nail ngaol. ⁴ Tsaol-aq iqsanl mail hevqkovq nail phaqaq bhai ya nail nee ovqtavq, maldil tsaq nail phaqaq bhai heeq nia lal dai, Miqyail movq deedeede nail ngaol. ⁵ Miqyail teevq gaq taivq-ail jaol khi, Miqyail khi tsaol-aq nail gaiqlaq bhai tsaolkhaiq teevq gaq jaol-ail teevq-eel ngaol. Aivq neq, tsaol-aq

pevq nail Yeiqsul Khali ngaol. ⁶ Aivq neq, tsaol-aq iqsanl bhai hevqkovq nail dai khi, aivq nail aqmaol laol bhiq-a nail ngaol. Aqyanq tsaq lal-u phao, ganl al bhai ngadao ya moel-a nail ngaol. ⁷ Al nail ganl salkhil khanq nail haqbhoil, ngal neq, daoq cavq cavq nail gaq khi gaqkhoel pevq lal dai maqkhaiq, neema thaqtsaol nail pha q khi maldil tsaq nail pha q nail ganl yu nail jeq-e jaq-a bhai cavq bhiq cov bhiq nail gaq pevq lal dai maqkhaiq, Miqyail ngaq bhai tsel dov lavq-a nail ngaol. Ngal niailhai ge nail neq, goiqbhaoq bhaoq nail maq ngel-ail. Daolcoev dai, ge nail ngaol.

⁸ Alheel ngel-i mail, yaoq dao yaoq-ao nee jaol nail yaqyov-aq juq, neema maq phail nail nee ovqtavq, maq jil pheeljaq dai, meeq nail haol nail lavqkhoel nee aqlavq bavq dil khi, geeqlaoq hal nail bhai ngal oil movq-ail nial.

⁹ Alhai dul dai, yaqmai-aq juq iqsanl, neema neenuq neebeiv aol nail nee ovqtavq, neema thaq nia nail lavqkhoel, aqgaq aqdoi doi heeq pha q-ail doi nail bhai ngal oil movq-ail nial. Uqhuq tsailkheel phai q nail, heel-i mail lav sav-ai tha q nail nlmaoq goe nail, laoqpav laolpav nail sainl goe nail khi, aqphoiq mao-ail phoiq nail aqgaq aqdoi doi nail bhai ngal maq oil movq-ail. ¹⁰ Thailhai ngaol-aq, nuljuq Miqyail bhai ev naol dai, ge nail yaqmai-aq juq ngel-i mail, yovqgavq nl heeq pha q-ail tsaq nail khe-ai, aqmeeq pha q nl nl-ail doevq yaoq.

¹¹ Yaqmai-aq juq neq, neema neenuq neebeiv aol nail nee ovqtavq, aqtsi tsu dai jaol khi, yu-i mail cavq lavq cov lavq nail bhai ya saol oil nail

ngaol. ¹² Yaqmai-aq neq, yu bhai cavq bhiq cov bhiq nail maqkhaiq, yaqyov-aq bhai uvthaiq nail maqkhaiq, ngal aqkhaooqanq maq bivq-ail. Aqyu juq neq, aqtsi tsu dai, ya jaol nail ngaol. ¹³ Khul khi mail dai ngal-aq neq, Aqdaq bhai teivq gaq khi mail pultavq, Eilbav bhai teivq-a nail ngaol. ¹⁴ Al ovqtavq, Aqdaq bhai jalmul mul ya-a nail maq ngel-ail. Yaqmai-aq gaq bhai jalmul mul ya khi, yaqmai-aq gaq nl bheeq-a nail ngaol. ¹⁵ Thailhai ngaol-aq, neema thaqtsaol nail, goil nail gaiq-a nail, meeq nail haol nail, neema thaq nia nail, aqyu juq niil juq nail lavqkhoel bhai ivq haq neq, yaq bhao-a nail ngel-i mail, aivq ya jel-ail nail ngaol.

3

Khali yaq munl bhai heldaiq phail nail gaq nail ganl

¹ Khali yaq munl bhai heldaiq phail nail ganl bhai halpov nail tsaol-aq, ganl aqmeeq halpov nail ngaol dai, ge-ai thaq nail daoq al daoq neq, tsaq deede neq nail ngaol. ² Alheel ngel-i mail, Khali yaq munl bhai heldaiq phail nail gaq, oeqbal thaq duq maq jiav nail tsaol-aq, khaqma teevq gaq taivq-ail jaol nail tsaol-aq, yaolphao nia nail tsaol-aq, neema ivqdao dai, thaq nia nail tsaol-aq, ev heeq pha-ail tsaq nail tsaol-aq, daq-i bhai hav nia nail tsaol-aq khi, cavq bhiq cov bhiq nia nail tsaol-aq ya pevq nail ngaol. ³ Aivq neq, jilpheed daol bov khi, yu bhai deeq nail tsaol-aq maq ya pevq-ail. Neema neenuq neebeiv aol

nail tsaol-aq, yu nee maq jil pheeljaq nail tsaol-aq khi, phul bhai neekhaol maq jiaiv nail tsaol-aq ya pevq nail ngaol. ⁴ Yovqgavq nail ildaog bhai aqmeeq-ai heldaiq phail nia khi, yaqmiq yaqyov juq daog naldaiq nail lavqkhoel nee, tsaq nail pha q bhai nl nia lal dai, cavq bhiq cov bhiq nia nail tsaol-aq ya pevq nail ngaol. ⁵ Khul khi mail dai ngal-aq neq, yovqgavq nail ildaog bhai maq heldaiq phail nia nail tsaol-aq, Miqyail nail Khali yaq munl bhai khalhai khi heldaiq phail nia nail-aq. ⁶ Aivq neq, Khali yaq aqsivq maq ya pevq-ail. Maq ngel haq neq, neema eeq lal khi, neivq heeqphaq nee mail teevq gaq khe-ai, yalkhaq dal nail bhai ya daq la geiq. ⁷ Khali yaq munl nail lavqniil phaol jaol nail tsaol-aq nail sivatvq bhai, khul teevq pha q-ail ge duq maq jiaiv nail tsaol-aq ya pevq nail ngaol. Maq ngel haq neq, yu-i mail khal ge movq-ail ge nail bhai ya daq khi, neivq heeqphaq nail lavqphee bhai phee lai nail ngaol.

Tsaojao-ai bhiq nail gaq nail ganl

⁸ Alhai dul dai, tsaojao-ai bhiq nail juq iqsanl, yu ev nail tsaol-aq ya pevq nail ngaol. Moeqlal lal jaiq covq nail tsaol-aq, jilphee q daol bov nail tsaol-aq khi, maq tsaq maq daol nail lavqkhoel nee phul halpov nail tsaol-aq maq ya pevq-ail. ⁹ Aqyu juq neq, oeqbal tha q duq maq jiaiv nail heeq nia nail neema aol khi, neema tha qtsaol nail pha q bhai tavq nail daogceevq nav deedee nail pha q bhai ivqdao dai nieivq thai q-ai tha q nail tsaol-aq yaq pevq nail ngaol. ¹⁰ Aqyu juq bhai iqmoeq laonqdaiq yaoq. Laonqdaiq khi,

oeqbal thaq duq maq jia v haq neq, tsaojao-ai nail gaq bhi jio vq yaoq.

¹¹ Alhai dul dai, yaqmai-aq juq iqsanl yu ev nail tsaol-aq ya pevq nail ngaol. Yu bhai khal ge movq-ail ge doil nail tsaol-aq maq ya pevq-ail. Yaolphaol nia nail tsaol-aq, khi yaoq pha q yaoq-ao nee nail lavqkhoel saljial ivq nail tsaol-aq ya pevq nail ngaol.

¹² Tsaojao-ai nail gaq iqsanl, khaqma teevq gaq taivq-ail ya jaol nail ngaol. Yovqgavq nail yaq khi yovqgavq nail ilda oq lavqkhoel bhai khal jaol nail tsaol-aq bhai aqmeeq-ai heldai q phail nia khi gaq lai nail tsaol-aq ya pevq nail ngaol. ¹³ Khul khi mail dai ngal-aq neq, tsaojao-ai nail ganl bhai aqmeeq-ai nl nail tsaol-aq, yu-i mail thaqeeq lavq nail bhai ya daq nail nee ovqtavq, Yeiqsul Khali bhai neema thaqt saol nail lavqkhoel nee geesil nail neema maq aol dai iqsanl, pevq lal nail ngaol.

Miqyail bhai ev khi uqhuq tha oq nail aol nail ganl

¹⁴⁻¹⁵ Mao-ail maq ma oq lal mail, naol jaol nail bha lee naol dai, ngal noe q-ai tha q nail ngaol. Thailhai ngaol-a oq, ngal lavqtsail mail ma q lee kev-u nee, Miqyail nail ilda oq lavqkhoel khalhai nl heeq pha q-ail tsa q nail juq naol ya heeq nia dai, ganl niil juq ngal na oq bhai gevq bhoel-ai leevq-a nail ngaol. Ildaoq al neq, aqdoevq doevq nail Miqyail nail Khali ya q munl ngaol. Munl al neq, maldil tsa q nail pha q nail haqbhoil ivq duq khi daoqtha oq ngaol. ¹⁶ Ngadao Khali ya q juq Miqyail bhai ev khi uqhuq tha oq nail aol neq,

daoq ceevq nav deedee nail ngaol dai, ge kivq nail ngaol.

Miqyail neq, aqsivq haqjoil phi khi doevq lee-a nail ngaol. Aivq tsaq nail daol nail ngaol dai, Aqhaqlal Miqyail salkhil khanq-a nail ngaol. Nqtavq gaqkhoel aivq bhai ya moel-a nail ngaol. Aivq nail ganl yu nail jeq-e jaq-a bhai ge gaiq bhiq-a nail ngaol. Miltsaq yaq aivq bhai neema thaqtsaol lal-a nail ngaol. Aivq bhai seiqleiq khaogsail nail lavqkhoel nee tsiqdal laivq-a nail ngaol.

4

Maldil saqlaq maq ngel nail juq nail ganl

¹ Aqhaqlal Miqyail bhaqlaoq kheq dai niailhai ge nail ngaol. Haoqnao naosaq khe aqn aqyanq nail lavqkhoel, tsaol-aq teevq pav ganav juq neema thaqtsaol nail pha q bhai khaonq haq nail ngaol. Aqyu juq neq, goiqbhaoq bhaoq nail aqheel juq nail daoq khi mail neivq juq nail daoq naldaiq nail ngaol. ² Neivq al juq, goiqbhaoq bhaoq nia nail tsaol-aq bhai juq juq-ail, alhai cavq bhiq cov bhiq nail ngaol. Aqyu juq nail heeq nia nail neema bhai neivq juq-i mail, tsaq nail maq tsaq nail pha q maq tselpav nia dai, bhi pevq ail-a nail ngaol. ³ Khaqma maq ya hevq, maq ya maol ail nail nee ovqtavq, jaqjaq daoldaol teevq pav ganav juq iqsanl maq ya jaq maq ya daol-ail dai, aqyu juq ge nail ngaol. Neema thaqtsaol khi maldil tsaq nail pha q bhai heeq nia nail tsaol-aq ngaq bhai tsiqeeq tsiqeeq-ail jaq nia dai, jaqjaq daoldaol al juq Miqyail-i

mail teivq-ai thaq khi ngaol-aoq, thaq jaq thaq daol dai, aqyu juq lav tsoiq nail ngaol. ⁴ Miqyail-i mail teivq-ai thaq nail yaoq pha q yaoq-ao nee, aqmeeq ngaol. Miqyail bhai tsiqeeq tsiqeeq-ail hav bhoel haq neq, khul pha q bhai iqsanl maq ya khaonq ha-ail. ⁵ Khul khi mail dai ngal-aq neq, Miqyail nail daoq bhaqda nee maqkhaiq, geeqlaoq hal nail bhaqda nee maqkhaiq, al juq meeq lal haol lal-aoq nail ngaol.

Yeiqsul Khali nail haqbhoil mao-ail meeq nail yaqkav

⁶ Aqivq jaqbheq Khali yaq juq bhai naol ganl niil juq cavq bhiq cov bhiq haq neq, naol neq, naoq-i mail tsaothe nail neema thaqtsaol nail pha q bhai tavq nail maldil tsaq nail pha q khi meeq deede nee cavq nail cov nail pha q nail lavqkhoel nee ee q lal-a nail Yeiqsul Khali nail meeq nail yaqkav teevq gaq pevq lal nail ngaol. ⁷ Aqphiq joiqmaoq juq-i mail ge nail, Miqyail bhai maq ev nail ganqje nail daoq juq bhai tha q naldaiq. Thailhai ngaol-aoq, Miqyail bhai ev lal nia dai, naol aqmeeq-ai nl jao jao yaoq. ⁸ Khul khi mail dai ngal-aq neq, aqsivq haqjoil phao gaq aol lal dai, nl jao jao nail juq neq, ganl micil ganav tsoiq nail ngaol. Thailhai ngaol-aoq, Miqyail bhai ev nail pha q neq, yaoq pha q yaoq-ao nee nail lavqkhoel bhai ganl tsoiq nail ngaol. Niil yeel nail haqbhoil maqkhaiq, yaqhao khe yeel nail haqbhoil maqkhaiq, ganl tsoiq nail ngaol.

⁹ Daoq niil daoq neq, saljial ivq khi, maldil hav bhoel heeq pha q-ail tsaq nail daoq ngaol.

¹⁰ Ngadao aqdoevq doevq nail Miqyail bhai noeqthunq thailthaiq nail ngel-i mail, laijai lai-jai-ail ganl nl thailthaiq nail ngaol. Aivq neq, tsaol-aq iqsanl nail Hevqkovq nail gaq ngaol. Aivq neema thaqtsaol nail tsaol-aq nail haqbhoil a dai nee maqtsil, Hevqkovq nail gaq ngaol.

¹¹ Ganl niil juq iqsanl yu bhai daoq bivq khi cavq bhiq cov bhiq yaoq.

¹² Naol yaqkhaq yaquv pevq nail bhai tsaol-aq teevq gaq-ail khal ge movq-ail thaq bhi ge. Daoq ge-u phao maqkhaiq, ganl nl-u phao maqkhaiq, Yeiqsul bhai neema thaqtsaol nail tsaol-aq juq nail haqbhoil saol oil duq bhi pevq yaoq. Naol nail goil nail gaiq-a nail pha, neema thaqtsaol nail pha khi, aqmeeq aphaol pha, niil juq bhai iqsanl aqyu juq nail haqbhoil saol oil duq bhi pevq yaoq. ¹³ Ngal kev lee-u phao kev dai, yu bhai Jalliq ge daiq bhiq nail, gaq bivq nail dai khi, cavq bhiq cov bhiq nail, niil juq bhai lai-jai nail lavqkhoel nee nl nl-ail jaol yaoq. ¹⁴ Khali yaq munl bhai heldaiq phail nail juq naoq nail kovtavq bhai aqlavq bavq dav-u phao, aqyu juq Miqyail nail haqbhoil gedan khi, aivq nail daoq ge ge-ail, naoq bhai aqhaqlal phao khe kovpavq bivq lavq-a nail ngaol. Naol kovpavq al ya-a nail khe-ai, aqmeeq-ai nl-ail yaoq dei-eiq.

¹⁵ Naoq-i mail nl nail ganl eeq lal heel lal thailthaiq nail bhai tsaol-aq iqsanl ya moel dai, al juq bhai neema kev nail lavqkhoel nee, mailma-ail nl yaoq. ¹⁶ Aqmeeq-ai yaolphaol yaolphaol-ail, aqdoevq doevq yaoq. Naol cavq bhiq cov bhiq-u phao iqsanl, aqmeeq-ai yaolphaol yaoq.

Al juq nail haoqnao neema ivqdao dai, doevq-ail yaoq. Naol alhai doevq haq neq, naoq bhai maqkhaiq, naoq nail daoq bhai ya gaiq-a nail tsaol-aq bhai maqkhaiq, hevqkovq nail ngaol.

5

Yu bhai khalhai ya nl bhiq nail ganl

¹ Aqbhal joiqmaoq juq bhai khaq khaq-ail thaq cavq bhiq. Agyu juq bhai naoq nail aqbhu khe-ai, saol-nvq-ai thaq khi cavq bhiq yaoq. Yaqyov-aq yaqnoil juq bhai naoq nail mailnail khe-ai saol-nvq yaoq. ² Aqphiq joiqmaoq juq bhai naoq nail aqma khe-ai saol-nvq-ai thaq khi, yaqmai-aq yaqnoil juq bhai neema aqhaol haol deel teevq bhee aol nail lavqkhoel naoq nail nailma khe-ai saol-nvq yaoq.

³ Heldaiq phail bhiq nail gaq maq jaol nail miqtsiq miqma juq bhai ev khi heldaiq phail bhiq yaoq. ⁴ Thailhai ngaol-aq, miqtsiq miqma aivq nail yaq maq ngel haq neq, aivq nail aqjievq lilheel jaol haq neq, yaq al juq yovqgavq nail ilkhaol khe tsaol-aq bhai heldaiq phail bhiq khi, aqbhu aqma aqphiq aqbhal juq bhai geeqlaoq nl kovq bhiq nail pha q neq, Miqyail bhai ev nail pha q pevq nail ngaol dai, agyu juq bhai cavq bhiq cov bhiq yaoq. Khul khi mail dai ngal-aq, alhai heldaiq phail bhiq nail pha q bhai Miqyail neema tsaq nail ngaol. ⁵ Aivq teevq gaq taivq-ail doevq khi, heldaiq phail bhiq nail gaq maq jaol nail miqtsiq miqma bhai neq, Miqyail bhai noe-qthunq khi, nqkiv n-gaol maqkhaiq, "Tsojao-ai lavq-o" dai, geeqlaoq hal nail ngaol. ⁶ Thailhai

ngaol-aoq, aqsiqv haqjoil phao lavqkhiq tsail nail pha q bhai taivq-ail halpov nail miqtsiq miqma neq, doevq khi ngaol-aoq, sil-a nail khe-ai, dul nail ngaol. ⁷ Yu oeqbal tha q du q ma q jia v dai, alhai nl yao q dai, miqtsiq miqma nail ya q ju q bhai dao q bivq yao q. ⁸ Tsaol-a q teevq ga q ganav yovqgavq nail jeq-e ja q-a bhai ma qkhaiq, a dai nee ma qtsil yovqgavq nail ilkhaol khe tsaol-a q bhai ma qkhaiq, ma q heldai q pha il ha q neq, Yeiqsul bhai neema tha qtsaol nail pha q bhai khaonq ha-ail ceevq-a nail khe-ai dul khi, neema ma q tha qtsaol lal-a nail tsaol-a q nee ma qtsil doil jai q nail ngaol.

⁹ Miqtsiq miqma nail aqmil gevq bhoel nail phaldoiq nail ganl nia ilhai ngaol. Aqkovq kovq tsel kovq bhee lal-a nail yovqgavq nail yovjil bhai saljial ivq-a nail miqtsiq miqma ju q nail aqmil bhai gevq bhoel yao q. ¹⁰ Aqmeeq pha q nl thail hal thailthai q nail ngaol dai, yu salkhil kha nq nail, ya q ju q bhai lav sav nail, da q-i bhai hav nia nail, Miqyail nail tsaol-a q nail aqkhi l bhai tsi q bhi q nail, ha q nail ao q nail ju q bhai tsaojao-ai bhi q khi, aqmeeq yao q pha q yao q-ao nee nl thail hal thailthai q nail miqtsiq miqma ju q nail aqmil taivq-ail gevq bhoel yao q.

¹¹ Thailhai ngaol-aoq, aqkovq ma q jia v lal tha q nail miqtsiq miqma ju q nail aqmil gevq bhoel nail phaldoiq bhai tha q gevq bhoel. Khul khi mail dai ngal-a q neq, aqyu ju q ma ol ail movq lal bhi q ha q neq, Khali nail uvthai q nail kov-uvq nee dov-ail nail ngaol. ¹² Alhai nl ha q neq, aqyu ju q-i mail iqmoeq phao ge-ai tha q nail dao qma saljial bhai aqyu ju q lav cov-a nail ngel-i mail, Miqyail-i

mail dal bhiq nail bhai ya daq nail ngaol. ¹³ Al ovqtavq, aqyu juq teevq il nee teevq il nalga nalga-ail, aqdoil doil-ail nail ngaol. Aqdoil doil-ail nail taivq-ail maq ngel-ail. Aqyu juq moeqjaiq jaiq lal khi, maq ge khaoq nail pha q ge lal nail ngaol. Aqyu juq bhai maq tavq nail, yu nail ganl bhai lav suqsaq nail tsaol-aq pevq lal nail ngaol.

¹⁴ Alheel ngel-i mail, aqkovq mao-ail maq jiav lal tha q nail miqtsiq miqma juq neq, maol ail khi ya q jaol lee nail nee ovqtavq, yovqgavq nail ilkhaol bhai aqmeeq-ai heldaiq phail nail bhai, ngal oil movq-ail nial. Alhai nl haq neq, ngadao bhai neejiav jiav nail tsaol-aq, ngadao bhai khal ge movq-ail ge duq maq jiav-ail. ¹⁵ Khul khi mail dai ngal-aq neq, niil aq-il iqsanl miqtsiq miqma teevq pav ganav juq lai q-ail thailthaiq khi, neivq Saqdaq nail haoqnao tsaother laivq-aq nail ngaol.

¹⁶ Yeiqsul bhai neema tha qtsaol nail yaqmai-aq teevq ga q ganav nail ilkhaol lavqkhoel bhai miqtsiq miqma juq jaol haq neq, aqyu juq aivq bhai tsu heeq pha q-ail tsa q nail ngaol. Alhai tsu q haq neq, kavbavq al Khali ya q munl bhai maq dal mail, Khali ya q munl neq, tsaojao-ai nail ga q maq jaol nail miqtsiq miqma juq bhai aqmeeq-ai tsu nia nail ngaol.

¹⁷ Khali ya q munl bhai aqmeeq-ai heldaiq phail nail aqivq aqtsu juq neq, ev nail pha q khi danq nail pha q bhai oil nail geel-nvq nail ngaol. Daoq cavq daoq cov cov nail khi yu bhai cavq bhi cov bhiq nail aqivq aqtsu juq bhai a dai nee maqtsil iqsanl ev khi danq bhiq heeq pha q-ail tsa q nail ngaol. ¹⁸ Khul khi mail dai ngal-

aq neq, “Gov bhai naoq thailthaiq nail niaoqnel bhai moeqkeivq maq ya keivq-ail” dai, Jalliq lavqkhoel bhai gevq-ai thaq nail ngaol. “Ganl nl nail tsaol-aq, ganl nl nail aqphoiq ya nail tsaq nail ngaol” dai iqsanl, gevq-ai thaq nail ngaol. ¹⁹ Salkhil khanq nail tsaol-aq nvq gaq hail gaq maq jaol haq neq, aqivq aqtsu juq bhai oeqbal thaq nail daoq bhai thaq naldaiq. ²⁰ Oeqbal nl thailthaiq nail juq bhai, tsaol-aq iqsanl nail sivtavq bhai khaq khaq-ail cavq bhiq yaoq. Alhai nl haq neq, yu iqsanl geesil nail neema aol lal nail ngaol.

²¹ Naol al juq nl-u phao, maq tselpav maq bhoilpav nail nee ovqtavq, maivphaoq eeq nil maq tsel dai nl yaoq dai, Miqyail khi Yeiqsul Khali nail sivtavq bhai maqkhaiq, tsel dov-ai thaq nail nqtavq gaqkhoel nail sivtavq bhai maqkhaiq, ngal naoq bhai daoq bivq nail ngaol.

²² Khaq sil gaq nail kovtavq bhai maqkhaiq, lavqtsail mail aqlavq thaq bavq dav. Yu oeqbal nl nail bhai naol teevq peivq-ail thaq aol lai. Aqhaol haol dai, doevq yaoq.

²³ Niai nee pultavq neq, ulcuvq taivq-ail thaq daol. Naol jaol hal maq dov nail haqbhoil khi ovqmav nail haqbhoil maq gal lal dai, aqheeq tsilju nail ullul iqsanl micil daol yaoq.

²⁴ Tsaol-aq teevq pav ganav juq nail oeqbal bhaqlaoq kheq dai dov lal khi, yalkhaq dal nail jaol duq bhai aqyu juq bhai hel-aivq nail ngaol. Tsaol-aq teevq pav ganav juq nail oeqbal neq, haoqnao taivq-ail dov lal nail ngaol. ²⁵ Alhai dul dai, nl-ai hal-ai thaq nail aqmeeq juq iqsanl

bhaqlaoq kheq dai dov lal nail ngaol. Niil aq-il bhaqlaoq kheq dai maq dov lal nail aqmeeq pha q juq iqsanl, khaq mao kev dai maq oil-uvq tha q nia-ail.

6

Ilheel khi yaqkav juq nail ganl

¹ Miqyail nail aqmil bhai maqkhaiq, nvjuq-i mail cavq bhiq cov bhiq-a nail daoq bhai maqkhaiq, yu khal ge movq-ail maq yaq ge dai, yaqkav juq neq, yovqgavq nail ilheel bhai mailma-ail ev nail tsaq nail ngaol. ² Khali yaq pevq nail ilheel juq nail kov-uvq bhai jaol nail yaqkav juq neq, yovqgavq nail ilheel nail aqivq jaqbheq pevq lal-a nail ngel-i mail, yovqgavq nail ilheel bhai maq ev dai jaol nail maq tsaq-ail. Ilheel juq nail haqbhoil ganl aqmeeq-ai nl nail tsaq nail ngaol. Khul khi mail dai ngal-aq neq, aqyu juq alhai nl-u phao, Khali yaq pevq nail, aqyu juq-i mail gaiq-a nail ilheel juq geeqlaoq al ya nail ngaol. Alheel ngel-i mail, naol ganl niil juq cavq bhiq cov bhiq khi gaq bhiq thailthaiq yaoq.

Miqyail bhai ev khi neekhaol sil nail ganl

³ Tsaol-aq teevq gaq ganav, bheeq-n nail ganl teevq pha q ganav yu bhai cavq bhiq cov bhiq khi, ngadao nail Heeqphaq Yeiqsul Khali nail cavq bhiq cov bhiq nail haol nail daoq bhai maq naldaiq haq neq, ⁴ aivq neq neema eeq khi, khul teevq pha q-ail maq heeq nia nail tsaol-aq ngaol. Aivq neq, daoq juq nail ganl nee khaq pheeljaq

khi jil pheeljaq movq deedee nail neema aol-ail teevq-eel ngaol. Alhai nl nail pha q neq, yu bhai maivjeel jeel nail, iqdaiq iqtsai dov lal nail, khal ge movq-ail ge nail, yu nail ganl haqev nail pha q saol-nvq nail, niil juq bhi dov lal nail ngaol. ⁵ Tsaol-aq al juq, aqmeeq pha q bhai saol-nvq nail pha q luq-ail seil-ail nail nee ovqtavq, maldil tsaq nail daoq teevq peivq-ail maq aol dai, jil pheeljaq nail pha q iqsanl bhi dov lal nail ngaol. Aqyu juq neq, Miqyail bhai ev nail ngel-i mail, jail jeq jeq lal nail ngaol dai, noeq-ai tha q nail ngaol.

⁶ Ngel nail ngaol. Miqyail bhai ev khi ngadao-i mail khal jiav nail pha q bhai neekhaol sil haq neq, jail jeq mao-ail jeq nail ngaol. ⁷ Khul khi mail dai ngal-aq neq, ngadao miltsaq kovtavq bhai doevq lee-u phao, khul teevq pha q iqsanl maq aol dai, doevq lee-a nail ngaol. Alhai dul dai, ngadao sil khi miltsaq niil nee dov ail-u phao, khul teevq pha q iqsanl maq oil lai q kivq-ail. ⁸ Alheel ngel-i mail, jaqjaq daoldaol khi aqgaq aqdoi jiav haq neq, ngadao neekhaol sil nail tsaq nail ngaol. ⁹ Hulmeeq mee q lal movq nail juq neq, jalmul mul nail lavqkhoel bhai aol ail nail ngaol. Aqyu juq lavqphee bhai phee lai nail nee ovqtavq, neenoeq neekha teevq peivq-ail maq aol-ail, maq mee q nail aqsivq haqjoil nail neekhaol mee nia pha q nail lavqkhoel bhai ga bhoel ail nia nail ngaol. Aqsivq haqjoil nail neekhaol al neq, tsaol-aq yaq luq-ail seil-ail nail lavqkhoel bhai bhi ga nevq ail nail ngaol. ¹⁰ Khul khi mail dai ngal-aq neq, phul bhai neekhaol jiav nail pha q neq, haqev nail pha q iqsanl nail daoqthaoq ngaol. Tsaol-aq teevq pav ganav

phul bhai neekhaol jiav nail ngel-i mail, neema thaqtsaol nail phaq bhai khaonq ha khi, noeqhaq noeq aog nail mee nia phaq aqyu juq nail neema lavqkhoel bhai teevq bhee aol lal nail ngaol.

Neema thaqtsaol nail phaq bhai tavq nail genl dev nail phaq

¹¹ Alheel ngel-i mail, Miqyail nail tsaol-aq-ol, naol al juq bhai gail jao jao yaoq. Tsaq nail daol nail phaq, Miqyail bhai ev nail phaq, neema thaqtsaol nail phaq, goil nail gaiq-a nail phaq, neema ol nail phaq khi, neenuq neebeiv aol nail phaq, niil juq nail haoqnao thekheel yaoq. ¹² Neema thaqtsaol nail phaq bhai tavq nail meeq deede nail phaq nail haqbhoil genl dev yaoq. Nqmaq maqluv halyeel doevq nail phaq bhai nieivq thaiq-ai thaq yaoq. Naol al phaq bhai ya dai, Miqyail naoq bhai khul khi tsaol-aq maodai gaq nail siltavq bhai naol ganl al bhai aqmeeq-ai salkhil khanq-ao nail ngaol. ¹³ Yaoq phaq yaoq nee bhai aqdoevq bhi doevq nail Miqyail nail siltavq bhai maqkhaiq, heeqphaq Bhoqthil Phillav nail siltavq bhai salkhil aqmeeq-ai khanq nail Yeiqsul Khali nail siltavq bhai maqkhaiq, ngal naoq bhai daoq niailhai bivq nail ngaol. ¹⁴ Ngadao nail Heeqphaq Yeiqsul Khali dov lee-u phao kev dai, naol lai q nail tsa nail phaq khi, oeqbal thaq duq maq ya dai, aivq-i mail daoq bivq-ai thaq nail khe-ai aqmeeq-ai naldaiq yaoq. ¹⁵ Miqyail-i mail noeqceiv-ai thaq nail aqyanq kev lal haq neq, aivq bhai bhi dov lee nail ngaol. Geeqlaoq eeq nail Miqyail neq, aivq teevq gaq taivq-ail uvthaiq nail ngaol. Aivq neq,

heeqphaq juq nail kovtavq bhai Heeqphaq ngaol. Miqyail juq nail kovtavq bhai Miqyail ngaol. ¹⁶ Aivq taivq-ail nqmaq maqluv halyeel doevq nail ngaol. Aivq neq, teevq gaq-ail aivq nail aqbhaq aqjail bhai maq lai nia nail lavqkhoel bhai doevq nail ngaol. Tsaol-aq teevq gaq-ail aivq bhai maq moeldaiq-a nail nee ovqtavq, moel iqsanl maq moel nia-ail. Nqmaq maqluv halyeel nail seiqleiq khaoqsail khi bhaqaoq aivq nail kovtavq bhai jiav dei-eiq. Aqmiq.

¹⁷ Eeq movq heel movq nail neema thaq aol dei-eiq dai, niil yeel nail lavqkhoel khe hulmeeq meeq nail juq bhai cavq bhiq yaoq. Luq-ail seil-ail nia nail phul heel yalkav bhai thaq noeqtunq dei-eiq, ngadao lavqkhiq ya tsail dai yaoq pha q yaoq-ao nee teevq bheeq teevq lovq bivq lavq-a nail Miqyail bhai taivq-ail noeqtunq yaoq dai iqsanl, daoq bivq yaoq. ¹⁸ Yu nail haqbhoil aqmeeq pha q nl bhiq yaoq. Meeq nail ganl mee nia pha q nl yaoq. Laoqniul maq niul dai, danq bhiq yaoq. Yu bhai maodai bivq yaoq dei-eiq dai, aqyu juq bhai daoq bivq yaoq. ¹⁹ Maljiaov dai aqdoevq doevq nail pha q bhai nieivq tha q-ai tha q kivq dai, yaqhao khe yeel nail lavqkhoel bhai nuljuq ivqdao deel daoqthaoq jiav dai, aqmeeq pha q hal pov jil tha q-ai yaoq dei-eiq dai iqsanl, aqyu juq bhai daoq bivq yaoq.

Tilmolseiq bhai haoqnao naosaq khe daoq bivq-a nail ganl

²⁰ Tilmolseiq-ol, naoq bhai av bhiq-a nail juq bhai aqmeeq-ai oil tha q-ai yaoq. Miqyail bhai maq ev dai ganl maq tsoiq nail daoq juq khi, jil

pheeljaq nail juq bhai gail jao jao yaoq. Neenoeq neekha aol naol dai ge khi ngaol-aoq, maq ngel nail neenoeq neekha juq bhai gail jao jao yaoq. ²¹ Tsaol-aq teevq gaq ganav juq, maq ngel nail neenoeq neekha al bhai naldaiq nail ngel-i mail, neema thaqtsaol nail gailkhaol bhai gail bheeq bheeq nail ngaol.

Nuljuq nail kovtavq bhai geeqlaoq eeljaol bhi jiav dei-eiq.

Jalliq aqsivq Gaolkheel daoq
Akeu: Jalliq aqsivq Gaolkheel daoq New Testament
copyright © 2015 Wycliffe Bible Translators, Inc.

Language: Gaolkheel (Akeu)

Contributor: Wycliffe Bible Translators, Inc.

All rights reserved.

2020-11-13

PDF generated using Haiola and XeLaTeX on 21 Feb 2024 from source
files dated 29 Jan 2022
aaaba9fd-8172-55cc-ad15-906f43ddb5a5